

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- लेफ्टिनेंट गवर्नर मनोज सिन्हा होरें आखेआ ऐ जे असें'गी देसै दी सुरक्षा ते खुशहाली लेई खतरा पैदा करने आहले हर इक आतंकवादी ते आतंकी गुट दे खात्मे दा धेइया करना लोड़चदा ऐ।
- कुलगाम जिले दे अखाल देवसर इलाके च छिड़े दे इक टाक्करे दरान सुरक्षाबलें अज्ज बडुलै इक आतंकवादी गी मारी-मुकाया ऐ।
- जम्मू-कश्मीर च लोकें दी कानूनी सेवाएं तोहड़ी पुज्ज होर बधाने दे मकसद कन्नै कानून मैहकमे नै अपनी किस्मै दी पैहली-पैहली नागरिक केन्द्रित सेवाएं आहली पैहलकदमी शुरु कीती ऐ।
- जम्मू संभाग दे जिला प्रशासनें आसेआ अज्जै थमां हर घर तिरंगा अभियान गी शुरु करने लेई सब्भै तैयारियां मुकम्मल करी लैती गेदि'आं न।
- 71में राश्ट्री फिल्म पुरस्कारें च हिंदी फिल्म 'द ट्वेल्थ फेल' गी सब्भनें शा बेहतरीन फिल्म दा पुरस्कार दित्ता जाह्ग।

<><><><><><>

LG-Army Officers

फौज दे त्रौनें सीगें दे अधिकारिणं दा शानदार प्रदर्शन ते नागरिकें दी सुरक्षा यकीनी बनाने लेई उ'नेंगी अभार, धन्नवाद ते ममारकबाद दिंदे होई उपराज्यपाल मनोज सिन्हा होरें आखेआ जे असें सब्भनें गी हर इक आतंकवादी ते आतंकी संगठन दा समूलचा नाश करने दा पक्का धेइया करना लोड़चदा तां जे स्थाडी सुरक्षा ते

खुशहाली लेई हर खतरे गी दूर कीता जाई सकै। कल राजभवन श्रीनगर च आर्मी वार कालेज माहू दे अधिकारिएं ते शिक्षण अमले गी संबोधित करदे होई उनें एहू गल्ल आक्खी जेडे उनेंगी मिलने आए दे हे। आर्मी वार कालेज च हायर कमांड कोर्स-54 करा'रदे अधिकारिएं कन्नै गल्ल करदे होई एल.जी होरें मजूदा समें दे भू-राजनैतिक ते भू-कूटनीतिक मुद्दे पर गल्लबात दे अलावा आतंकवाद रोधी रणनीतिएं ते आतंकी ढांचे गी भलेआ खत्म करने बारै पूरी सरकार दी नीतिएं दे बारै बी विचार बटांदरा कीता। लेफ्टिनेंट जनरल हरजीत सिंह साही, जेडे जे आर्मी वार कालेज दे कमांडेंट न, हुं'दे अलावा होर अफसर बी इस मौके मजूद हे।

<><><><><><>

Kulgam-Encounter

कश्मीर दे कुलगाम जिले च अज्ज बडुलै अखल देवसर इलाके च होए दे टाक्करे च सुरक्षाबलें इक आतंकवादी गी मारी-मुकाया ऐ। इलाके च आतंकवादिएं दी मजूदगी बारै इक पक्की सूह थोने परैन्त सुरक्षाबलें आसेआ कल संज्ञां चलाए गेदे अभियान दरान एहू टाक्करा शुरु होआ हा। फौज, जम्मू-कश्मीर पुलिस ते केन्द्री रिजर्व पुलिस बल आसेआ सांझे तौर पर चलाए गेदे इस अभियान दरान जंदी रातीं लगातार दपक्खी गोलीबारी हुं'दी रेई। होर ब्यौरे गी अजें बलगेया जा'रदा ऐ।

<><><><><><>

Citizen Centric Services

आम नागरिकें गी दिक्ती जाने आहिलिएं सेवाएं च बेहतरी आहनेने भेठा इक महत्वपूर्ण गैंऽ पुट्टे होई विधि, न्याऽ ते संसदीय मामलें सरबंधी मैहकमे नै जम्मू-कश्मीर दे मुख सचिव अटल डुल्लू होरें'गी इत्त सरबंधी नमी-नमी पैहल बारै जानकारी सांझी कीती। एहू पैहल 10 बक्ख-बक्ख प्रारूपें च तैयार कीती गेदी इक बवस्था ऐ जेदे राएं आम लोकं दी न्यायिक सेवाएं तोड़ी सैहज ते सखल्ली पुज्ज यकीनी बनदी ऐ।

इस बवस्था तैहत आम लोकें दी न्यायिक सेवाएं तोड़ी पुज्ज, परामर्श, सलाह, सहायता ते मदाद यकीनी बनोग ते प्रदेश ते जिला सतह पर कनूनी सेवा प्राधिकरणें कन्नै संपर्क राबिता बी सखल्ला बनोग। मोबाइल ऐप दी शकली च तैयार कीती गेदी इस पैहल कन्नै केंद्र ते यू.टी दे नियमें-प्रावधानें, अधिसूचनाएं ते कनून मैहकमें दी वेबसाइट ते कन्नै इंडिया कोड वेबसाइट तोड़ी लोकें दी पुज्ज बी सखल्ली बनी सकोग।

<><><><><><>

CS-Jk Samadhan

मुख्ब सचिव अटल डुल्लू होरें जन शकैत मैहकमे दी कारकरदगी ते छमता दा जायजा लैने लेई इक बैठक सद्दी जेदे च जे.के समाधान ते सी.पी ग्राम पोर्टल दी मदद कन्नै किस हद्दे तगर लोकें दिएं दिक्कतें गी दूर करने च कामयाबी हासल होआ करदी ऐ, एहदे बारै जानकारी हासल कीती गेई। बैठका च प्रशासनिक सचिव ते मैहकमे दे सीनियर कार्जकर्ताएं केंद्र शासित प्रदेश दे बक्ख-बक्ख हिस्सें थमां वर्चुअल ढंगै कन्नै शिरकत कीती।

<><><><><><>

Mission-YUVA

अनंतनाग-राजौरी पारलिमानी हल्के थमां सांसद मियां अलताफ होरें मती तरजीह आहले फ्लैगशिप कार्यक्रम 'मिशन युवा' मेले दा उद्घाटन कीता। राजौरी दे बेला पार्क च आयोजित इस मेले च बड़ी बद्द गिनतरी च आप सहायता समूह हिस्सा लै करदे न जेडे सरकार दिएं स्कीमें दी मदद कन्ने अपना कम्म रोजगार शुरू करियै अपने पैरें पर खड़ोआ करदे न।

एहदे अलावा मेले च 'युवादूत' ते हुनर निर्माण ते विकास इकाइएं जिनेंगी स्किल बिल्डिंग एंड डेवेलपमेंट युनिट्स दे नांऽ कन्नै जानेआ जंदा ऐ, दे अलावा कई बपार विकास हब बी हिस्सा लै करदे न। इस मौके मीडिया कन्नै गल्लबात करदे होई सांसद मियां अलताफ होरें आखेआ।

<><><><><><>

Har-Ghar Tiranga

हर बारी आहला लेखा ऐकती बी मुलखै दे बाकी हिस्सें आंगर जम्मू-कश्मीर च बी स्वाधीनता दिवस दे सिलसिले च हर घर तिरंगा अभियान चलाया जा'रदा ऐ जेड़ा अजादी आहले ध्याड़े 15 अगस्त तोड़ी जारी रौहगा। इस सिलसिले च कल उधमपुर, रामबन ते किश्तवाड़ जिले च सरबन्धित डिप्टी कमिशनरें ते कठुआ जिले च अतिरिक्त डिप्टी कमिशनर होरें जिला मुख्यालय च हर घर तिरंगा अभियान दे आयोजन बारै सलाह-सूत्र कीता। इनें बैठकें च इस आयोजन दे बक्ख-बक्ख पैहलुएं पर तफसीली सोच-विचार कीता गेआ जे किस चाल्ली कन्नै बक्ख-बक्ख गेड़ें च इस मुहिम दा सरिस्ता करियै इसी तोड़ चाढ़ना ऐ तां जे मते शा मते लोक, हर इलाके च एहदे नै जुड़न ते अजादी दे इस जश्न दा हिस्सा बनन। इस बारै पेश ऐ स्हाढ़े जिला संवाददाता दी एह रिपोर्ट।

<><><><><><>

National-Fil Awards

71में राश्ट्री फिल्म पुरस्कारें दा ऐलान करी दित्ता गेआ ऐ। हिंदी फिल्म 'द ट्वेल्थ फेल' गी सब्भनें शा बेह्तरनीन फिल्म दा पुरस्कार दित्ता जाहगा।

कल संज्ञां नमीं दिल्ली च निर्णायक मंडल दे अध्यक्ष आशुतोष गोवारिकर होरें दस्सेआ जे शाहरुख खान ते विक्रांत मैसी गी 'जवान' ते 'द ट्वेल्थ फेल' लेई सर्वश्रेष्ठ अभिनेता दा राष्ट्रीय फिल्म पुरस्कार प्रदान कीता जाह्ग। एहदे अलावा रानी मुखर्जी गी फिल्म 'मिसेज चटर्जी वर्सेज नॉर्वे' च शानदार अभिनय लेई सर्वश्रेष्ठ अभिनेत्री दा पुरस्कार दित्ता जाह्ग।

<><><><><><>

NEP

राष्ट्री शिक्षा नीति 2020 भारती शिक्षा बवस्था च सुधार ते बेहतरी आह्मने लेइ, पुट्टेया गेदा इक ऐसा बदलाव दा कदम ऐ जेदा सकारात्मक असर मुख्य भरै च दिक्खने गी लब्बे करदा ऐं रामबन जिले च शिक्षा विभाग नै एहदे साब्वै कई जागरूकता कार्यक्रमें दा सरिस्ता कीता ऐ जिंदे च व्यापक जानकारी, हुनर सिखलाई कार्यक्रम, शिक्षा गी लचीला बनाने लेई डिजिटल सेवाएं गी शामिल करना, विद्यार्थीएं दिएं जरूरतें पर केंद्रित शिक्षा प्रदान करने दी बवस्था, क्षेत्रीय ते मातृभाषा च पढ़ाना ते इस चाल्ली दे होर कई बदलाव जिले च आंदे गे न। इस बारै जानकारी दिंदे होई डाइट रामबन च जिला सतह दे मास्टर ट्रेनर शाहनवाज गणी होरें आखेआ।

<><><><><><>

Sampoornta Abhiyaan

रजौरी दे जिला इंतजामिया आसेआ कल जिले दे डाक बंगले च सम्पूर्णता अभियान सम्मान समारोह दा सरिस्ता कीता गेआ। इस कार्यक्रम दा मकसद ख्वास ब्लाक च विकास दी तांग आह्ले अकांक्षी ब्लाक कार्यक्रम तैहत हासल प्रगति दा जश्न मनाना हा।

सांसद मियां अल्ताफ अहमद लारवी होरें इस कार्यक्रमै च हिस्सा लैता ते हफ्ता भर चलने आहले सम्पूर्णता अभियान सम्मान समारोह दे इक हिस्से दे तौर उप्पर बनाई गेदी अकांक्षा हॉट दा उद्घाटन बी कीता। उत्थे उ'नें बक्ख-बक्ख मैहकमें आसेआ लाए गेदे स्टॉलें दा निरीक्षण कीता जिंदे राहें लोकें गी विकास सरबन्धी पैहलकदमिएं ते कल्याणकारी योजनाएं दी जानकारी दित्ती जा'रदी ऐ। ए.सी.पी. शीराज़ चौधरी होरें इक लौहकी ज्नेही भूमिका कन्नै इस कार्यक्रम दी शुरुआत कीती जेहदे मगरा रजौरी दे डिप्टी कमिशनर अभिषेक शर्मा होरें औपचारिक सोआगती भाषण दित्ता।

<><><><><><>

Cricket

लंदन दे ओवल च इंग्लैंड कन्नै एंडरसन-तेंदुलकर टेस्ट क्रिकेट श्रृंखला दे 5में ते अखीरले टेस्ट मैच दे त्रीये ध्याड़े अज्ज भारत अपनी दुई पारी 2 विकेटें पर 75 रन्जें शा अगगे शुरु करोग। मैच, भारती समें मूजब दपैह्ली मगरा साढ़े 3 बजे थमां शुरु होग। कल दिनै दा खेड्ड मुक्कने तोहड़ी यशस्वी जायसवाल 51 ते आकाश दीप 4 रन्ज बनाइयै क्रीज पर हे। एहदे शा पैहले, इंग्लैंड दी पैहली पारी 247 रन्जें पर समाप्त होई गेई ही ते उसी भारत पर 23 रन्जें दी बढ़त थहोई ही।

<><><><><><>